



焦太史編輯國朝獻徵錄卷之六十七目錄

通政司

掌司事尚書

張文質

鄭紳

掌司事侍郎

李致省

謝宇

沈祿

通政使

賀銀

李錫

柴義

楊載鳴

汪宗元

李際春

左右通政

趙居任

陳嘉猷

劉文

徐世英

趙侃

杜明

党承志

李秦

左右參議

趙昂

王萱

張龍

張寰

張選

王汝言

趙邦柱

南京通政司

通政

強珍

夏崇文

余本

林時

沈束

參議

李文郁

張詡

朱廷益

焦太史編輯國朝獻徵錄卷之六十七

通政司

太子少保禮部尚書張文質傳

實錄

太子少保禮部尚書張文質字允中直隸昌黎縣人
正統七年舉進士授工科給事中景泰中陞都給事
中以音吐鴻鬯選爲通政司右叅議天順初進左通
政復進通政使成化中加兵部左侍郎工部尚書俱
仍掌通政司事旣而加太子少保改禮部尚書管部
事歲餘以母喪去服除仍以禮部尚書掌通政司事
後爲言官所劾致仕弘治五年四月卒賜祭葬如例

文質爲人重厚有容居家以孝稱歷官四十餘年無
過舉其子忱亦舉進士爲兵部郎中

掌通政司事工部尚書贈太子少保鄭公紳神

道碑

孫 陞

工部尚書致仕鄭公卒子錦衣衛指揮僉事瓏以聞
詔贈太子少保賜祭葬公諱紳字公珮別號敬菴其
先保安州望族高祖思明徙保定府之涑水縣思明
生秀秀生友以從兄征進都勻東苗西堡有功授錦
衣百戶世襲遂定居都城友生表以從征大同有功
晉副千戶累指揮僉事贈百戶君如其官兩世近臣
又皆功能表見而都城之鄭漸著公爲指揮君長子
當承廕乃顧雅嗜文墨年十餘受書不釋手指揮君

侍朝蚤起公必先焉歸入戶輒聞讀書聲定省唯時色詞以恭指揮君暨母胡相顧喜曰世稱讀書人門理道習孝敬吾兒信然大吾門必此兒也令就學於司徒李公李公大奇之一時同學多士鮮或之先焉名起都城籍甚舉正德丁卯順天鄉試甲戌進士乙亥授戶部主事巳卯父指揮君卒侍疾執喪務竭其情旣葬廬於墓側百日以母命歸處中門外不入私室不與宴會者三年辛巳補戶部晉員外郎尋遷鴻臚寺右少卿癸未左少卿丙戌卿戊子居母喪庚寅起任通政司右通政癸巳左通政丙申通政使是歲

遇宗廟工完贈祖若父如公官祖母母皆淑人巳亥扈從南狩賜衣帶銀瓢三事巳晉工部右侍郎以慈慶慈寧二宮工及城垣鼓樓京倉諸工數賜金幣庚子以皇穹宇工加俸二級及金幣之賜巳晉尚書掌通政司事俸食一品甲辰考績贈祖若父如公官祖母母皆夫人公自入官三紀凡九遷不出都城門而累績近列晉位上卿恩每逮其先人時子瓏由廕階典禁獄累晉今官孫崇孝以公廕補太學生且嚮用鄭氏數世武文迭興語都城華閭咸推轂鄭氏公曰吾其止足時矣遂上疏乞老得俞旨是爲歲乙巳公

既賜休甚適乃故都城居也朝大夫舊游及諸後進知公名數就公訪政理輿馬相屬公一切謝避之乃於都城之南里許築居號南池書院引泉種樹鼓棹中流城隅而江湖若也就訪者又至乃又去都城數十里於西山得冷泉之勝築居號北泉書院偕朋舊子姓數輩以往間來南池復往釣鮮茹美探幽尋樂悠悠乎浴沂風雩之懷而香山洛社之儔矣公之詩曰世多君子扶皇極天放閒人養太和都城人誦焉公事父母孝事仲父如所生仲父持家政有幹濟勞公念之爲文勒石墓所示不忘與諸從兄弟約曰所

爾我視也母有餘不足論也吾黨今則七人矣其先一身耳願世世同堂合食毋改於今日約定俸入不門以費久之食指以千計勢不得終合公乃悉捐先世遺業讓諸兄弟曰吾固食公家人也烏用此諸兄弟感泣弟紋幼公教之學後以鄉進士仕至濟南府同知故所師事李公寢疾獨招公受遺囑如子公爲治後事如所生同學友病疫且死不能語執公手授之千金竟不語乃後公爲卜居定業安處其妻子子長以所餘金還焉居官門無私謁而公亦未嘗干人以私涑水邇都城邑侯有爲夫役之餽者公曰吾家

世邑人也乃今詎可私役邑人謝之居身不喜爲無益之勞所在正襟屏息坐竟日因以敬名菴卒之前數日手爲書遺親戚朋舊備道情故曰吾其長別矣嗚呼達哉公宦篋涼薄無厚遺乃後卜築兩地樂隱十餘年供具不乏則今指揮君竭情善承之也余聞之都城人又聞之先伯兄伯兄與今指揮君同官錦衣同試武科稱莫逆交乃語曰水積澤深善積福積若公者行善終身承先啟後以稱於世曰德門宜矣公卒爲嘉靖己未六月十七日距生成化己亥十二月十日享年八十有一

李孜省傳

實錄

孜省江西南昌人初爲吏待選京師成化丁酉因太監錢義何興以祈禱術見先帝試之驗傳授太常寺丞言官劾之改上林苑監丞未幾傳陞通政使司右通政賜金冠法劍各一圖書印三文曰忠貞和直曰妙悟通玄有所奏請用以封進孜省又採取符籙諸書以獻寵信日隆八年間官至禮部左侍郎掌通政司事恃恩驕恣有忤己者必害之工部主事張吉兵部員外郎彭綱劾之皆被謫孜省益自肆遂并吏部尚書尹旻及其子編修龍所與往來太僕少卿張燧

給事中袁昇工部侍郎談倫主事王範翰林侍講學士焦芳修撰曾彥編修王勅司經局洗馬羅璟禮部郎中劉紳員外郎楊榮吏部郎中鄭宏兵部郎中鄒龔等並以次謫降士大夫皆畏之亦有陰附以媒進者於是致仕副都御史劉敷爲右都御史禮部郎中黃景爲左通政南京禮部侍郎尹直爲兵部左侍郎工部尚書李裕爲吏部尚書通政使邊鏞爲僉都御史李和爲南京戶部左侍郎其同僚通政司參議元守直張璞陳琬俱進品秩又採取時論所推若學士楊守陳少詹事劉健都御史李敏侍郎李嗣大理寺卿張錦馮貫及吏部侍郎徐溥學士倪岳南京國子監祭酒劉宣通政黃孔昭左都御史余子俊等皆密封推薦縉紳之進退多出其口人亦無敢言者矣致省已戍邊衛遇赦當還太監蔣琮言致省罪大不當赦復械繫至京下錦衣衛獄致省不勝考持至是死

掌通政司事工部右侍郎謝宇傳 實錄

掌通政司事工部右侍郎謝宇字伯寬湖廣耒陽人景泰初命入文華門與內侍同學爲國子監生授中書舍人歷陞禮部員外郎太常寺少卿并本寺卿兼司經局正字於內閣制勅房書辦前後幾四十年上登極以東宮侍從恩陞工部右侍郎掌通政司事秩滿陞俸二品弘治六年閏五月卒賜祭葬如例宇善楷書亦工繪事性警敏善得人意指享有榮祿以終其身子汝賜舉進士

掌通政司事禮部右侍郎沈祿傳 實錄

掌通政司事禮部右侍郎沈祿字汝學順天府宛平

縣人由舉人授通政司經歷祿妻爲今 昭聖慈壽

皇太后之姑弘治改元 皇太后正位中宮祿遂超

遷本司右叅議俄轉左甲寅進右通政戊午進通政

使壬戌改禮部右侍郎仍掌司事正德元年十二月

卒於官賜祭葬贈禮部尚書祿以恩澤致位九卿遭

逢之異近世所無有然其人篤於友愛少失怙其兄

浙江僉事舉教之有成後舉致政家居祿事之甚恭

撫遺孤曲盡恩義人以是多之

通政司通政使賀銀傳

實錄

賀銀台州臨海人洪武中爲桃源縣學教諭用薦陞
宛平縣知縣 上起義靖難銀率縣僚吏給兵士芻
餉永樂二年陞通政司右叅議九年陞工部右侍郎
坐事降工部營繕司主事十七年陞通政使銀素闕
廉譽及爲侍郎坐累籍沒其貲甚厚復官遂改行其
卒也家具蕭然時永樂十八年九月

太子少保通政使司通政使咸寧李公錫行狀

楊鼎

公諱錫字天祿先世居平陽大父曰克讓以公貴贈通議大夫通政使始徙家西安之咸寧父曰榮讀書習禮鄉里號為善人歷贈通議大夫通政使母康氏歷封太恭人再贈淑人生公於洪武乙丑二月年十五入郡校為弟子員永樂戊子歲二十二中陝西解首明年會試禮部中乙榜優等授蒲州學正己亥九載滿獻績來朝陞行在吏科給事中壬寅丁父憂洪熙改元冬制終轉禮科宣德丁未給勅命授徵仕郎

贈其父爲給事中封母爲太孺人辛亥遷右通參議
甲寅給誥命授奉政大夫父母俱進封贈乙卯陞右
通政正統戊午再給誥授中憲大夫父母亦俱贈癸
亥轉左通政甲子陞通政使景泰庚午又給誥授通
議大夫贈祖父皆如巳官祖母母皆淑人壬申加大
子少保癸酉以風疾休政歸公自幼穎敏過人見者
奇之旣長爲弟子員苦志勤力昕夕匪懈不事浮華
不近聲色爲學正時毅然以師道自居凡教人立心
削行皆以身先之故出其門者咸器而足用爲黃門
時整飭典雅小心鎮密得近臣體在通政時封駁章
奏通達下情雖倥傯繁劇而井井有條無壅滯之弊
又能不察察小失有大臣德量以至處家教子居喪
閑退無一不得其宜所以入官四十餘年歷事五朝
無小過可紀宜乎身榮存沒官封祖考家用平康厥
嗣繁衍而其實足以傳於後世也耶

通議大夫通政使司通政使宜石柴公義墓志

銘

楊一清

正德辛未間予在吏部嘗求刑曹之明習法令不爲
利誘勢屈者尚書劉公及兩張侍郎以主事柴君義
對進爲員外郎已而聞先是有劉信者以毆傷人被
誣繫獄君當鞫之時劉瑾專政庇其所厚者屬君坐
信死君曰枉坐非辜義不敢爲也瑾銜之方圖中傷
而瑾敗伏誅得免禍予嘆曰真法官矣是年冬會鞫
重囚於朝予當執筆尚書命君讀獄辭明朗有節有
所矜疑予詰問之應答如流無弗中肯綮予益喜識

之明年壬申通政司官缺員 武廟詔吏部求稱是
任者廉得數人而君在列引入內廷試之有旨用君
遂擢通政使司右叅議予以君之才不止此而出納
命令所係甚重且柄用之階不忍視也比予得謝歸
江南十越歲嘉靖乙丑再起廢西征事寧召還入內
閣而君已進擢左通政矣次年丙戌 今上親擢爲
通政使以其音吐洪暢容止端重甚眷注之嘗命近
臣傳諭通政司官奏事當一如柴義越二年戊子冬
一日君方出造親友家歸至內室忽得疾不能
言予同僚石門翟公君姻家也聞而往視急延醫診
之已不可藥遂卒翟公既經紀其喪屬予一言銘諸
幽可無辭按翟公所述狀君姓柴諱義字時中別號
宜石其先浙之仁和人隸騰驤右衛籍遂家於京師
曾祖秀春祖清父潤以軍功授錦衣衛百戶封通政
使司右參議母黃氏封太宜人君生穎脫儕輩知孝
敬父母性俱方嚴髫年就遣外傳督之學苦志經史
遂舉鄉薦登弘治乙丑進士所得俸資俱上之太宜
人一毫不私蓄尤篤友愛作屋數間悉以讓其兄仁
弟禮居之鞠其幼甥周尚文如已出比長捐俸助聘
資俾之有室性寬厚與人處謙謙持謹言溫而氣和

庸微錄 卷之六十七
人樂親之下至臧獲吏僕未嘗見其有疾言遽色家居衣服飲食甚儉朴蕭然如未仕時生成化癸巳二月二十九日壽纔五十有六 上聞其卒甚悼惜命所司賜祭葬如例

通政武東楊公載鳴行狀

胡直

方嘉靖末廕臣竊魁柄頤指天下士平時爰書赫蹠以示銓臣列某當內某外某上某下一日飛數楮若傳閨閣語雖太宰以下咸拱聽奉若畫一而一時幽明慶罰之樞盡歸私家於時予邑武東楊公以銓部郎適管選事柄家挾所爲又憑鄉故關說彌繁要在必從公心厭薄之久之以其來楮擲地作色不可柄家遂大銜忌者乘之進孰譖傷公竟落職左官聞之將樂典史由是中外縉紳想望風采嘆曰是大浸將稽天乃有茲砥石何其特立也公之名遂燁布中外

既出一時當事者咸弭耳惕息爭先爲役士大
習爲之大變歲壬戌柄家既敗天下名流唯冀
公一朝還朝與當塗共濟然公竟逡巡補外服稍遷
至銀臺而病作矣未幾公竟不起此豈獨一邑一家
之戚已哉公家居武山之東故號武東載鳴名虛卿
字也上世華陰人南唐虞部侍郎輅來居廬陵二世
徙吉水至宋盛時曰允素始繇吉水徙泰和又十三
世曰景行舉元進士官翰林待制事載史傳又三世
爲文貞公士奇大顯於世又再世爲太僕公昱乃公
之曾大父也昱生雯雯生天柱公訓天柱公性嚴重

有家範以貢補華亭學官遷岷府黎山王教授以公
貴贈吏部員外郎娶劉封太安人以正德甲戌十月
廿三日生公公生而方面或言類文貞幼穎敏殊常
兒五歲就外傳靜重不爲佻弄七歲業舉子至九歲
天柱公方試有司歸卽以所試目試公公立就又嘗
爲族人著勿齋賦有奇思天柱公曰汝大賢後當紹
先烈寧學近時士止科第著稱耶未幾著資聖錄一
卷言治安事曰吾將執此以獻天柱公笑而火之曰
非小子先務也歲戊子以童子就試邑侯及督學使
者皆首諸生補弟子員歲丁酉踰冠今元相徐公督

學試吉安士得公定名虛位論大加賞異曰是能從
韓文脫胎者江南第一卷也名益振是歲舉省闈高
等戊戌第進士天柱公方教諭華亭 先皇帝出幸
承天公得從例歸省如華亭時人榮之己亥補廣東
潮州府推官公天性方稜既居官益砥礪操節廣中
吏故有貼班銀曰助衙錢公至首罷免有鄉宦自閩
寄香茶公不啟封還之餽遺請託盡絕至刑名出入
未嘗不規規焉措意也常曰推官法吏法生殺人易
耳一付吏人手鮮不爲奸又或視上官指下上其手
故公於讞獄亭疑一主公正而行以詳慎

文出躬裁吏人袖手無能爲弊穴者時公方盛年然
稱敏練推第一云潮故有橋稅異時監者乾沒其間
入恒寡公監未一月輒倍其入以是在潮凡一歲再
被薦踰年丁外艱聞喪卽行每痛天柱公未面訣語
輒涕泣免喪補登州府推官登海國器訟動連數百
人當道聞公至則故知名也多委艱大事公亦畢力
自效不避怨瘁不數時庭無滯獄囹圄遂空代巡党
公薦公有冰清玉潔鑑空衡平之語時謂知言丁未
行取補吏部稽勲司主事歷陞考功員外郎滿考得
贈封其父母公在部感激思報而當時士習事體日

選人各報鄉缺

垂公乃退自淬厲力謝餽謁物爽人署勅家人鑰宅舍務絕賓親獨行一志然遇賢者未嘗不款接咨語人材狼狽不自怠居部凡七稔始晉掌銓事時公於人材臧否既考鏡瞭晰乃首擇其望而淹者拔若干人摘其圯而倖者抑若干人曹中吏多匿善缺市厚賄故應選上有數年不得出者選君未皇稽也公乃示應選者呈報其鄉之缺官不踰月缺盡出公於三大選中按次除補無復壅滯歡聲載道往時外寮文憑付權貴家僮轉鬻各外省承差至必索厚利廉吏尤苦之公建白按季類付巡按御史分致其屬一

時大便公管選凡五易月士論翕然顧獨與柄家私心刺繆或為公危公不之撼也甲寅春行取天下官員有推官郭某者素善文公少嘗偕友人讀其文躄之時在念至是因按其前考語最遂置取列而郭適以它事被叅柄家遂摘此訾公而甘心之公既蒙譴過家起居太安人即赴將樂未一歲量移惠州推官道經滄峽舟覆漂蕩五十里幸免於難方覆時公自檢考生平無欺君父傷人害物事可質天神決未當死既出未見有恇憾意捫髮憤猶故也識者異焉是夜宿野舍賦詩自慰又著為滄峽志謝城隍祭役人

咸有文門人黃侍御緝刻以傳而公自序題曰困喻錄公之至惠州也當道不欲煩以吏事公因固請中丞王公乃從士民願以惠志托公公殫精摭思凡閱月書竣其有關郡邑利病兵賦善處一篇之中反覆致意務爲永鑑而隨事抒謨翼教衛道意肫如也學士文人傳誦謂足駕武功安陽二家矣未幾得召復爲南吏部主事進考功郎中故事南考竣當陟卿寮公又以地望久次人也復因考察貳於舊寮再出爲四川僉事時論滋不平而公分巡川西樹剝蠹無幾微不堪之色時川有採木重役使者鱗鱗載道日費千一百公條布慎委手註出納隨時批答事無少壅吏抱文書睨視莫敢出氣撫臺黃公代巡郭公相與嘆曰是絕無觖望之氣者二公不以常數遇薦皆重語亡何擢廣東督學副使公卽毅然以復古道正士風爲任其造士先德行後文藝首揭義利爲諸士辨別布行冠婚喪祭飲射儀則而亮節峻履又足以表導之至文行品題明若觀火公若執衡士無敢譁潮令某者墨而苛公曰予奉璽書擊貪墨清化源是不可貸竟去之潮人至今樹石巖宮以志感頌廣大夫士謂自魏莊渠歐陽石江以來蓋僅覩公云庚申夏

轉福建叅政遭母喪奉柩歸諸有司各賻金帛悉峻拒之既出境無敢以絲髮獻者持喪必稽於禮叅酌文貞公遺約不敢帛不設暈舉樂爲邑縉紳倡人咸服焉癸亥再免服入都當事以公久淹當處京堂公蹙然曰仕無崇卑顧建樹何若耳今某免服再仕求不負所學以忝先臣何遽以崇秩相加也竟不能奪仍補河南叅政時論愈高公謂公固難於權貴擠忌之日而尤難於廟堂推挽之辰公聞自若也公未至汴卽有通政之擢海內志士聞者彈冠相慶而當軸益有意顯用之乃公竟一疾以逝蓋癸亥十月四日

也嗟乎此豈人也哉公天性篤倫誼奉太安人曲盡至情友其兄寒松公及弟能卿無不怡怡寒松先逝撫遺孤尤厚遇天柱公故友雖下劣必侍坐出入四方謹奉文貞公像以隨曰異日吾得見烈祖無覩顏也嘗經紀從叔給事公之喪與殯送侍御党公周卹其後士林義之生平憐才好善若出饑渴見人一語之工無不嗟羨彌日或手自抄錄迄其身無倦意蓋公自圖史之外無它嗜玩素不問家有無誨其子首上德誼薄勢利不得口官勢叫囂鄉里又刻文貞公遺誠誠之家居未嘗一干有司其廉隅有人或難堪

者嘗大書晚節二字於堂內其勵志如此

通政使汪公宗元傳

郡志

汪宗元湖廣崇陽人登進士授行人乙未遷南京工
科給事中改兵部武選主事己亥改尚寶丞歷少卿
乙巳遷南京太僕寺卿修馬政條例遷太常卿修太
常志輯國朝名臣所建白爲經濟考庚戌遷副都御
史總理河道漕流以通會時柄臣嚴嵩嫌其不附已
罷爲福建叅政尋轉右布政使外禦倭寇內察民所
疾苦復三運八運之法歲省民金萬餘釐其賦爲正
辦雜辦檄汀建諸鹽商使畫疆而鬻又檄南臺洪塘
去其互稅鹽利以興而商不告病後二年始轉江西

左布政使治如閩政化大行無何轉應天府尹改順
天晉通政使久之公避怨引例自陳勒致仕歸家奉
母揚太夫人歡甚卒賜祭葬所著有經濟考皇明文
選春谷集若干卷

通政使李公陽春傳

杞縣志

李際春字應元嘉靖乙卯舉於鄉明年成進士授行
人時琉球中山王請封應往者各以計脫公獨毅然
請行適倭寇浙閩往返艱危中幾三載初解維時颶
風大作波浪兼天不分晝夜舟刺刺有聲若分崩然
衆皆股慄公獨危坐神色不動俄而紅光燭天若有
神緋衣峩冠擁護得免事見使琉球錄中 天子嘉
勞擢爲尚寶丞累遷至通政使時江陵相用事中外
多傾附之公獨抗直不阿由是有中傷意公嘆曰大
丈夫以七尺軀何至作兒女態向人媿趨取容乎遂

投袂而歸，旁構園圃，時花卉於其中，名其堂曰逸親。父病不解衣而寢，居喪哀毀，骨立歲時，伏臘輒痛哭流涕。其天性篤孝如此。萬曆癸未病卒，朝廷遣官諭祭。

通政司左通政趙居任傳

實錄

趙居任，應天府溧水縣人。洪武中，以耆老授通政司左叅議。陞山東布政司左叅議，再陞左通政。嘗奉使日本，其王贈以名馬，方物悉却不受。上聞而嘉賚之，命往蘇松治水。居任雖以清介自持，而無恤民之心。在蘇州十餘年，督治水及農務，每霖沒田禾，不待雨止，廣集民男婦踏車出水，隨去隨溢，低田終不可救。高鄉之民困於其役，不得盡力農，而居任恒以豐稔聞。永樂十七年，以疾卒。民用慰悅。

通政使司右通政陳嘉猷傳

實錄

通政使司右通政陳嘉猷字世用浙江餘姚縣人景泰辛未進士授禮科給事中改刑科時朝鮮國王私授建州董山官命嘉猷齎詔往責之惶恐伏罪未幾使滿刺加國封王航海值風舟壞得不死歸治舟再往竣事還陞通政司左叅議尋陞右通政丁父憂奪情起復未幾卒年四十七遣官賜祭時成化三年冬十月嘉猷儀觀豐偉善於敷奏因宣彈文音吐洪亮嘗爲英廟所屬意云

通政使司右通政劉文傳

實錄

通政使司右通政劉文字宗華山西大同縣人以鄉貢士選習夷字舉正統元年進士授中書舍人仍譯字十四年扈從北征還陳邊務數事 景皇帝召入便殿面問之尋命提督四夷館丁母憂詔奪情任事陞吏部郎中天順初以迎駕陞右通政石亨敗坐黜爲臨安府同知復召入爲郎中提督夷館成化五年再陞右通政九年命偕都督李文撫安西番三年而後歸因乞休致至家卒訃聞命有司致祭文在夷館最久熟知夷情屢有建請多所採納云

通政使司左通政徐世英傳

實錄

徐世英字國用常之江陰人祖晞兵部尚書世英幼好學攻書正統末以薦授中書舍人督寫武臣黃譜積勞陞通政司左叅議進南京通政司右通政九年轉左弘治初言者論其儉邪冒進貪不知恥以本自致仕弘治三年八月賜諭祭如例世英生貴家歷官久積貲厚以此致譏然薄於自奉謹祠祀睦族調人之急有足稱者云

通政使司右通政趙侃傳

實錄

趙侃字至剛貴州普定衛人天順甲申進士授吏科給事中遷都給事中陞右通政清理軍職誥命侃起戎伍無他長其在言路因人成事而已適清理軍職誥命通政缺吏部意在其屬以侃陪文選郎中黃孔昭上請御筆點用故事凡書名先科道後部屬吏部以侃居孔昭次上特點侃名用之命既下而輿議未愜成化十七年五月卒賜祭如例

右通政杜公明傳

李濂

公諱明字文昭河南祥符人也姿貌俊偉司寇金堂杜公銘爲郎中時以公事至汴見而異之試以文優乃遣入邑學爲弟子員擇諸生中有文行者俾從之游公時貧甚顧刻志讀書靡間寒暑兩肱當几處木爲之穿由是業益進領天順壬午鄉薦成化戊戌登進士第拜禮科給事中封駁克慎有聲諫垣維時陝西甘肅洮河岷州等處邊儲積弊滋甚公以才望奏璽書稽察之乃會同巡按御史徐舟暨陝西藩臬二司自成化十三年以後各倉場糧芻一一盤驗洗姦

剔蠹風采凜然凡黜而罪者若干人人不以爲刻成
化未言事者尚細故多被譴謫公掌科事最久多所
建白務持大體善類倚賴之丁未春正月天下諸司
例朝京輦公首倡大班舉劾來朝官丰儀音吐動人
憲廟簡注遂擢通政司右叅議弘治辛亥轉左叅
議壬子擢右通政公感知遇益奮勵不懈出納惟允
聲稱籍甚廷議屢屬公勘處哈密洎巡撫順天山西
皆不果行朝著方留公柄用忽遘疾不起時乙卯春
三月也得年六十 上聞訃遣官諭祭有曰方當大
用胡遽云亡蓋深惜之先是公喪女不出同列奏事

上詢公何在其素荷眷注如此公重厚端慎能急
人之難鄉人凡以事至京者有所控告必盡心爲之
所無不感悅而歸初娶劉氏貌甚寢親族多不堪其
配至有勸遣之者公禮之終其身不衰鄉人稱其有
陰德繼娶劉氏並受 錫命贈封宜人云子昌正德
戊辰進士官御史巡按山西能振揚風紀蚤卒士論
惜之天順壬午東平梁御史覲按河南試知公有稱
賞語是歲鄉試公在中列而梁寔監臨有劉僉事瑄
者與梁有隙因指公及同榜袁江唐昭爲梁之所私
以奏併逮至京下館閣覆考其試卷入格乃得釋明

年癸未會試河南鄉試通一榜獲第者止袁一人唐

登成化乙未進士劉奏之誣於是益驗劉文靖公成

化丙午 憲廟為皇太子納徵有旨取禮科庫貯寶

鈔裝盒公偕諸給事開取之庫無一貫眾愕然失色

曰鈔非吾儕所收必須挨究已往陞調去任者公曰

挨究前僚法之正也有誤大婚伊誰之責乃奏曰本

科庫貯寶鈔年久浥爛不堪裝盒請下戶部行令寶

鈔局選取直挺新鈔送庫以備用 上允之於是大

婚禮成而前僚咸免挨究朝著服公善處大事如此

弘治甲寅祥符尹段鑑恒以刁民某等為憂乃列其

姓名惡蹟走書於公屬其白諸新巡按御史除之公

笑曰令苟廉慎無難處之民陰害同鄉之人以媚邑

宰吾不為也竟不從其言鄉里聞之稱為長者同邑

監生楊獻歷事武選卒於京邸公往弔之為治棺殮

且遍告同鄉宦於京者共資助之以歸其喪時郎中

天台戴君豪聞之曰楊生歷事吾司不幸客死杜公

助其喪獨為義士邪亦捐俸以助人兩德之銀臺杜公遺事

通政司右通政党公承志墓志銘

閻樸

公諱承志字汝孝別號牧川幼而穎睿甫十歲已摛
文清暢弱冠入郡庠督學王公鴻儒石公玠試而奇
之曰天下士也於是聲望日溢正德庚午舉於鄉明
年連擢進士授直隸保定府推官公蒞以明恕有疑
獄則立爲判決其怙終者不少貸居三年故俗大革
治行稱天下第一乙亥徵拜刑部主事會吏部司屬
缺員朝廷慎簡諸曹更補時太宰陸公重許可獨器
公奏調驗封主事公感奮思報乙卯武帥導先帝
巡行方岳衆惴惴莫敢諫公具疏謂朝政紊斁威柄

下移宜親賢遠奸恭默圖治蹇蹇千餘言辭甚激杖於闕下尋欲解任終養其父諭之曰汝但效忠王事勿以吾繫心乃已未幾陞稽勲司員外郎嘉靖改元預修武廟實錄成覃恩錫誥是冬充晉藩冊封使卻餽遺不受癸未陞驗封郎中甲申議大禮抗疏忤旨復被杖繼調考功再調文選先是選法壅於請託公銳意裁抑凡銓除擬注各量才器權貴惡其厲已深銜之丙戌擢通政司右通政提督武職錄黃丁亥值災異詔求直言公上疏條陳者四曰節財用曰減徵需曰飭邊防曰練京卒皆切中時弊權貴不悅遂

陰諷言官論列然無可指之瑕止攻其峭執竟坐罷古所謂因貶見褒者與旣歸杜賓客絕交際暇則與二三逸老遊眺川壑怡神自足彈冠之念泊如也先後撫按薦起凡十數已亥今天子舉用屈滯吏部合臺諫疏公儒術弘深特宜甄錄不果或勸結津要公謝曰行藏有命君子貴守道不辱身枉尺直尋吾不爲也庚子北虜內寇郡城卑且壞公有憂亟白撫臺檄令增築民樂輸其力工成恃以無恐又捐貲葺古文昌祠輪奐孔飭別構堂數楹羣諸子姪及鄉之俊秀課業於中挾策鼓箏洋洋而興焉公天性夷曠

篤於倫理事父樂軒公曲盡愛敬弟承賜進監察御史卒於官恤其嫠字遺孤如已出處鄉人底裏洞見恂恂煦煦若無廟廊貴者居常博覽強記自經史百氏以至兵刑律曆象緯堪輿之說靡不該貫故其文涵肆演迤蔚然成一家言老不廢詩視少作尤縝密淵粹得唐人體後學爭傳誦之晚著忻州志若干卷暮年髮澤面晬矍鑠無惰容俄頃疾作翌日遽不起遡其生成化丙午十月十二日享年七十有三

左通政李公秦傳

郭 朴

李秦字仲西河南臨漳人生而穎異嘉靖十三年舉於鄉明年登進士改庶吉士授刑科給事中尋轉吏科左條陳時政六事 上嘉納之著爲令陞禮科都給事中時分宜任禮部尚書新有寵子蕃頗放縱納賂秦抗疏劾之分宜惶懼訴辯疏雖留中不報而秦聲望大著後竟遭中傷調倅大名分宜屢因考察欲罷秦奪於公論不果秦在郡聽斷明允屢白疑獄有濬民屈際者素虐其妻妻逃去妻父告際毆死沉屍於河指際讎僕證其事際誣服獄成數歲秦閱案疑

之密訪於五橋堡民家獲際妻際得開釋歲饑上官委秦施賑旬日徧歷十一邑給散有法全活甚衆郡守載之守魏錄永爲荒政武陟鳳陽府同知父喪去任服除陞戶部郎中尋丁母喪服除補武選郎中陞通政司右叅議遷左通政自嚴氏專政淹滯外內二十餘年後竟爲其黨所排歸來結廬洹上名曰知止時與朋舊吟咏灌蔬種芋此外無所事也卒年七十

通政使司右叅議進階朝列大夫趙公墓志

銘

李東陽

先生姓趙氏諱昂字伯顥竹溪其所自號也舉正統甲子鄉貢登乙丑進士第觀吏部政授中書舍人直內閣領文臣誥勅事戊辰禮部會試充掌卷官己巳丁母憂景泰庚午起復修歷代君鑒壬申兼司經局正字書成賜金織文綺甲戌以歲旱代祀淮瀆乙亥修寰宇通志丙子成復賜金幣擢翰林院編修天順丁丑英廟復辟超擢通政使司右叅議督武官誥黃尋充蜀府冊封正使其所領多文翰禮儀事餘無

所見也甲申 憲皇卽阼出爲瑞州府同知至則勞
撫字勤綜理所屬學校尤加意課勸藩臬部使未嘗
吏視之必稱之曰能丙戌丁繼母憂歸己丑服闋輒
上疏乞休命復舊官致仕自是屣脫榮利放意詩酒
間雖處城市不異林壑燕游登眺惟意所適京府
飲禮寘賓席亦歲赴焉丁未 今天子登極詔進
朝列大夫其卒以庚申九月十日子五翊舉鄉貢知
宿松縣茲舉進士歷刑科都給事中光祿寺少卿靖
鴻臚寺序班次立次竚先生風神朗徹性度寬裕與
物無忤居家事上卹下務敦恩意親鄰雖疏遠必致
情愛雖幼且賤亦加禮接慶弔問遺舉無違闕解紛
拯難常若不及公卿大夫及勲戚貴胄罔不愛慕父
喪致客千人仕雖未達而姓字甚著童兒隸卒皆稱
爲趙伯顯先生無異辭尤博涉羣籍善吟咏工書翰
所著有貽安叢桂二集竹溪小稿若干卷

奉政大夫通政司右叅議王君萱墓志銘

費宏

君諱萱字時芳姓王氏別號青崖生有異質七歲書
過目成誦十歲能文十六入邑庠學使者見其文皆
奇之既冠魁弘治辛酉鄉試明年登進士入翰林爲
庶吉士自是益肆力於學館閣諸老見其文皆奇之
越二年拜刑科給事中會今上改元正德太白屢
見君謂弭災圖治貴以實應天今之要務則在戒因
循廣聽納親賢臣而已蓋諸司有所建白少與時忤
內批輒寢而不行此因循之大弊也故君首及之且

其詞懇惻有所感動。上嘉納焉。閱月又陳五事。其一謂古人記人君君動。今既名修撰編修檢討爲史官。則宜令編錄時政以公是非。用懲勸其四事。欲懲怠玩以除盜賊。禁科索以甦民困。清寃獄以廣仁恩。去奔競以振吏治。皆時弊所當亟救者。聞者皆稱重之。未幾移病乞歸。時逆瑾擅政。以怨除都御史雍泰。名君坐嘗薦泰。罰輸邊米三百石。瑾尋矯令諸請告踰年者皆致仕。君遂廢處林下。幾三年。庚午瑾敗。君復故職。居兵科。值四方盜起。君條陳八事。謂其患始於玩忽而成於蒙蔽。所以禦之者多非其人。賊能設覆出奇以待我。而我徒應以不教之民兵。宜屢敗而無益也。且詔書有自相捕斬之購。而有司槩不奉行。衛所雖設官軍。而擅調旣難。罪責不及。今宜重蒙蔽之罰。開自新之路。更用良吏。廣蓄將才。屈羣策募死士。有警聽便宜調軍策應。不專責州縣庶羣盜殄滅。有期章下。兵部多議行之。壬申。以四川師久無功。擇才往視衆。以屬君。君被命誓必滅賊。卽條上機宜八事。籌慮精覈。類履軍而素講焉者。至漢中聞賊勢未衰。乃復以添設大將請廷議。用都督時源率邊兵鼓行而西。又以總制屬之都御史彭公濟物於是渠魁

廖麻子喻思倖等詭請聽招要我盡撤諸兵處其衆於開縣臨江市巡撫以下皆墮其計欣然會奏以爲奇功君方入蜀境亟移書辨其不可奏至朝廷幸賊解散且降獎勵之勅矣然識者謂廖賊稔惡流毒決不可原且君奏未至亦不能無疑也不數日君果以賊徒復叛聞乃停前勅用君言治主招者之罪君以賊以招誤我且其黨駱松祥度三兒等皆坐船而蔓也自是督剿益嚴諸將吏材鄙勇怯及功過所當刺舉者銖稱鑿別不少假借當道亦諒君忠懇言必見從時方用陳珣代楊宏爲總兵而以藍海代閻綱爲

副矣君復疏其不職竟以徐謙周誠易之於是賞罰嚴明人思奮勵戰始協力旣踰年諸賊擒馘殆盡蜀境乃平 上嘉君功擢通政使司右叅議人以爲宜君素孱弱緣軍務積勞益病丙子使荆府冊封王子得便道歸覲二親久之始持節還朝妻子皆留家侍養又明年戊寅五月十一日以疾卒京師春秋僅三十有七士大夫惜君之才未究於用莫不悲之君自幼負大志以剛正廉潔自持其自蜀還藩臬郡縣發視筭篋示不持軍中一物荆王循故事賄贈固辭遇事敢言如在蜀劾貪吏舉遺賢表貞烈請帑蠲租賑

窮皆非使指所急然得之聞見必吐乃愜性尤嗜學
手不釋卷其詩平淡清逸爲文章力追古人疏暢警
拔奏議尤明辯峻厲纏纏不窮嘗極論軍中四害旁
引曲喻切於事情諸老亟加歎賞以爲非流輩可及
有青崖集若干卷藏於家

張龍

弇州別記

龍弘治中進士性傾險狐媚時壽寧侯帝外家有殊
寵而龍陰附之擢兵科給事中再選通政叅議 帝
亦微得狀龍家多姻中貴戚里生奪人田舍貲產會
考察吏部擬削職 帝笑曰此人歸必亡賴爲大盜
乃令止謫守灤正德初龍以珍異賂劉瑾擢真定守
劉瑾誅復諂附錢寧召入爲右通政則日夜趨寧門
爲通中外賄近百萬而龍所受謝亦不訾會寧爲諸
給事御史交劾寧比龍龍所挾受徐漢興白金五百
兩黃金百兩王通白金千兩下獄案問朋黨交結亂

朝政者斬未決以庾死

通政使司右叅議張公寰墓表 歸有光

公姓張氏諱寰字允清世爲蘇州崑山人曾祖諱用禮贈奉政大夫刑部郎中祖諱稹考諱安甫邠州知州封奉直大夫刑部員外郎初奉政有四子稹其長也次和中順大夫浙江按察司提學副使次穆大中大夫浙江布政司右叅政兄弟以文章節行稱於世號二張先生次种濮州判官始 英宗皇帝臨軒策士中順兄弟同舉禮部大中名第二及八對策中順第一 天子使小黃門密至其邸識之以有目青寘二甲第一大中積官當入爲都御史會李尚書秉爲

大理寺卿王槩所排大中在李公奏中遂罷官而弟四人惟伯與其季不爲進士而伯實生奉直公其季生大理評事申甫又皆舉進士奉直性高簡不屑世故爲邢州滿任卽致政詔嘉之增秩以歸蓋張氏子姓不甚繁衍而世登科甲二張先生最有名而公父子仍紹其美崑山之人以是榮貴之公登嘉靖辛丑進士明年知濟寧州至則減損戶徭拊循流亡州水陸二驛併水驛須冰泆乃給陸以省其費修學舍揀生徒才俊者督課之創方正學先生祠時奉直公就養在濟雅不樂公居孔道晨夜飭儲待候望

疏乞改官濮州濮於濟北境而僻公益蠲去繁苛出庫錢以賑饑荒水嚙州城公新築增羊馬城東郡有大賊詔書名捕不得公陰誘其豪具得囊橐遂捕斬之巡撫都御史上其最兵部以非邊功格不行下內艱服除補開州州瀕河河溢水退多填闕之田豪民兼併以虛租影射下戶公命魚鱗比次以絕其姦輯二州志修衛公子路墓陞刑部山西清吏司員外郎尚書以公才令攝浙江司郎中獨循寬法人以無冤居頃之予告歸養奉直公春秋高愛公甚常同卧起頃刻不離年八十有四而終公居喪廬墓有乳燕之

祥服除授通政司右叅議司事清簡散衙後卽從名
流賦詩會九廟災詔京朝官三品以上自陳而公秩
五品往見夏學士問詔旨欲自陳夏公謾應之曰可
蓋素不樂公欲悞之也公遂自陳得致仕以強年坐
廢論者惜之其後撫按先後薦吏部特表薦皆不行
公之歸也惟以圖史自娛臨摹法書揮翰竟日不倦
而好遊名山初嘗從奉直公觀雁蕩登天目父子相
隨衣冠儼雅浙人慕之後益得縱意渡浙江南抵武
夷至匡廬還觀石鍾小孤采石九華黃山白巖足跡
幾遍東南先是坦上翁與名士吳琬陸崑輩爲湖社
孫太初亦與其中坦上翁者前工部尚書劉公麟也
建安李尚書嘗稱兒翁峴山了無宿具惟以乳羊博
市沽風雨瀟瀟欣然達夜高風可想而翁獨與公善
公晚入社而顧尚書諸名賢皆在公春秋如期至茗
上社畢輒遊山然以其人夷曠多愛所至大吏迎將
人比之鄭莊千里不齎糧自陽明歿後學者稍稍離
散公嘗游其門至是吉水鄒謙之餘姚錢德宏以師
門高第會講懷玉之山公欣然赴之欲以明年爲大
嶽之遊而遘疾不起矣實嘉靖四十年正月二十四
日年七十有六公爲人篤於行誼事長姊終身孝敬

不哀置義田以贍宗族少年有善推獎逾分以故多
依歸之陳主事者分司濟寧註誤繫獄公抗言使者
竟白其寃楊太僕杖死朝堂召故人賓客爲棺斂所
部三州經三十餘年其人猶不絕問遺其見愛如此
人或當筵有所凌忤但坐睡少頃欠伸卽命肩輿去
終未嘗有所較也晚歲惟務遊覽在舟中之日爲多
家事一無所問人望之蕭然有神仙氣云

通政使司左叅議進階朝列大夫張公選墓志

銘

黃正色

靜思張公與余同舉於鄉同登甲榜出宰又同浙地
及內召公擢給事中以言事罷職余遷南臺亦以言
事謫戍其出處意氣僅相同也而今已矣傷哉公諱
選字舜舉靜思其號世爲無錫人張之先在宋有循
王者薨葬青山相傳公之遠祖入國朝諱策者寔公
五世祖策生謾舉賢良方正任廣東高州府通判生
士名士名生友諒友諒生東涯翁獻可以公貴封蕭
山縣知縣娶周氏封孺人則公之高曾祖考妣也公

生而秀拔東涯翁雜生徒中教之頗覺聰穎稍長銳志於學雖祁寒溽暑誦讀達旦爲文惡剽竊務得肯綮乃已正德乙亥恒山張公督學補邑庠弟子員公故家貧需館穀養父母中罹顧華二孺人喪貧益甚其游從者樂其造就彬彬多成材時邵文莊公慎許可每見公文特歎羨之於是師資日衆嘉靖戊子領應天鄉薦己丑第進士筮仕浙之蕭山蕭山固紹興隸邑當閩楚要衝人稱難治公下車厚儒生興學校尊鄉飲別淑慝士論攸歸民情向化然後稽冊籍括丁田之多寡較贏縮均徭役之重輕驗豐斂而徵國

稅虞浸滂以築海塘土豪肆攘奪者抑之冗員恣淫食者汰之尤所嚴者民命無論真贗公必閤實始繩之法設施朞月遐邇胥嚮而頌聲作矣他如誠格海神而護堤沙漲仁孚物類而獸遁蝗殄豈古所謂偶然者非耶諸監司風聞交相騰劾遽沐內召辭邑之日行李蕭然士民立生祠樹去思碑識感云赴銓擢戶科給事中緘書報東涯翁曰兒今叨言官矣言官嘿嘿恐貽尊人羞適值 太廟裕祭 上遣勲臣代行公思鬼神不歆非類夫子不云乎吾不與祭如不祭矧裕祭大禮 聖駕不出必有沮之者卽疏奏伏

闕候旨 上御文華殿覽疏震怒命廷杖八十杖折者三公精神愈爽論杖者曰吾罪甘死汝無累 聖天子有殺諫臣名杖已出朝瀕死藉諸元老洎同鄉諸君投之砭劑幸獲生還抵家養病禪院授徒贍親出入徒步凡有所往必告親而行遇奇果輒懷歸以獻東涯翁晚邁咳逆周孺人亦患首疾公遍求名醫治之勿藥乃喜一日不戒於火闔門驚悸公百方經畫構堂數楹公語宗戚曰吾非愛輪奐也勉強安吾親防火警耳公置別墅力課耕農又語宗戚曰吾非好勞動欲給親饗飧耳時撫按諸監司灼公廉靖忠

孝屢薦於朝公固辭之二親捐養公喪之如禮初殯在室出告反面如存故西淙洪公頽其堂曰忠孝公平居接人煦濡謙虛未嘗形矜驕色伉儷相敬如賓待從弟情踰同胞下迄子壻訓導諄切人或非義干之畧不假借立論不避權貴處朋儕肝膽畢露當春掩骼埋胔暑月施藥膏療人瘡瘍隆冬煮糜粥調凍餒使公握樞機以生天下其雨露沾被可推也公暇結社碧山偕行輩縉紳爲真率會嘯歌觴咏追王謝故事歲學宮行鄉飲酒禮虛大賓以俟公赴數四僉曰宜之丙寅冬 世宗皇帝大漸軫念曩抗言受譴

諸臣遺詔復公給事中加陞通政使司左叅議致仕未幾今上卽位建儲覃恩進階朝列大夫隆慶戊辰十一月卒距生弘治甲寅十月年七十有五所著有諫垣遺稿歸田養浩集碧山吟社稿卜筮範占作縣事宜躬耕記事等集藏於家

通政使司右叅議洪泉王公汝言墓志銘

孫鑛

王公諱汝言字子慎號洪泉其先吳人徙山東之濱州高祖能永樂中以軍功授武驤左衛百戶遂居京師生福福生弘弘生二子次日鑛鑛爲布衣豪娶張氏嘉靖乙酉二月三十日生公於京宅公生有異質十歲能文弱冠游鄉校中己酉與余兄少宗伯公同舉於京兆明年試春官不第入太學是時先君宗伯公爲祭酒大奇公癸丑復與余兄俱進士出身授行人有廉直聲咄咄臺省選矣丁巳乃遷爲戶部江西

司主事是時執政貪初選時人或謂公曰囊空矣稱
貸何如公曰是貲郎矣且以是入也欲志行得乎是
年轉餉遼東明年監江南稅又明年以毋憂解任壬
戌復除戶部浙江司主事監銀庫司出納僧人爲奸
甚公訶察密織瑣無不加意增定諸約束至今遵之
會公宗人有與賈錢通者人因以傷公公性褊急聞
之不能平因之尊官所辯焉尊官曰徐之事未可知
也公愈怒忿激不能擇辭攘袖曰索賄者豈人乎骨
肉相殘子孫隸樂籍而是時官尊者方不飾於簞簋
以爲公設語侵之遂大恨癸亥大計吏公遂貶一級

外補揚州府通州同知臺使者檄守江都已又守海
門江都饒而衝海門僻而貧公以簿正減供張而以
本業勸瘠土不數月兩縣皆治於是江北一時翕然
稱王同知聲譽流於四府爲諸州最會客將來鎮通
州縱其軍恣睢於市公持之又面數其罪於途客將
者遂劾公以廢格軍興公亦疏辯而是時以倭寇方
劇 天子不欲傷武臣意詔下復貶秩一級而州同
知品從六貶則爲正七秩當知縣大學士李公興化
人稔知公善因請於天官願得王同知治敝邑乙丑
五月遂除興化知縣爲政自刻勵公廉不私一錢訟

者見輒決獄辭皆造自手胥人莫得與焉縣患水築堤障之自後稍得有秋貧民歸業縣中政清蒞事二年仍擢戶部陝西司主事抵滄州聞父憂未及任歸庚午復除戶部湖廣司主事贈父鑣如其官母張氏安人明年遷通政使司右叅議公爲人豪爽好讀書以博聞多能自負應物敏速官無逋事工書喜談笑在京師賓宴飲無虛日典州縣亦樂延接卽鄰境士大夫無不謂淇泉公親已者然狹中不能少忍好刺譏時事有不善者雖非已所與常曉曉不已又負氣高自標置以不折節於人爲賢故貴者多不喜庸流亦多厭之用是頻起頻仆及是遷也寔以公登仕籍久向遭謫非其罪特超用之而忌者猶謂公才非異等捷徑致顯位意稍不滿踰年復爲言者所中謫爲兩浙都轉運鹽使司副使改忠州知州治如在興化時蜀中稱之明年大計吏以通政使司右叅議免官家貧甚僦屋以居衣食或不給而談笑自如世言察廉者不當於官當於家豈不然哉公好奕與人對奕或竟日獨居則讀書爲娛間授徒焉余嘗共公奕公曰僕復官矣公知之乎余曰何哉公曰今茲以通政叅議罷也豈知州乎因公大笑無何病矣公素知醫

及病作甚篤諸醫皆不效莫知所爲公稍以意指授之得少間尋亦漸愈然衰頹非昔比矣已卯病復作遂不起

奉政大夫通政使司右叅議觀一趙公邦柱墓

志銘

郭正域

予與安甫自童子時同起庠膠予長安甫五歲乃安甫先予六年舉於鄉後予六年成進士予在翰林安甫在吏部予南安甫亦南子歸安甫亦歸安甫於里中獨雅重予兩人生平多切劘語凡文章行藝予不忝一日之長言無忌諱而安甫領畧獨深予邁大難安甫驚悸泣下其後安甫無疾而逝天何奪吾安甫之速也按狀安甫姓趙氏諱邦柱其先豫章廬陵人之速也按狀安甫姓趙氏諱邦柱其先豫章廬陵人宋宗室有經畧豫章者世家廬陵自敬榮公徙楚之

咸寧生魁賢魁賢生鶴爲諸生餼於庠生安甫其仲也性穎敏美秀白皙望之如玉人時蒲圻魏順甫有文名海內一見安甫文大奇之曰吾閱人多矣無如趙仲子遂以次女女焉年十四補諸生十九爲歲丙子舉楚第三人己丑舉禮闈授戶部主事監崇文門稅課九門鹽法薊州邊餉一毫不入私橐人稱其守改吏部主事有饋玉卮而詭言墨挺者覲其受也見而卻之諸凡干瀆一切謝絕已念姚太宜人病請告歸而太宜人逝以不及視含斂願天擗地布席柩側服闋謀屏居田野奉太公菽水而太公促之行甫治裝而太公捐館哀毀骨立會銓部與政府不協相君故以事憾先後吏部諸郎遂下旨半逐諸郎而公名在所逐中調南京禮部儀制司主事朝野不平而公無幾微見顏色在南十年買舟負米以供朝夕意豁如也少宰止菴楊公宣言於朝曰以趙某才品可久淹南耶改南京吏部文選司郎中時太宰爲見臺曾公有道經留都者訪人才於曾公公曰諸曹吾所未悉也吾署中宜莫如趙賢已陞南京光祿少卿曾公意未愜旣致政去復以書言於當路不令公知也會以皇太子千秋入賀時宰握其手曰公久淹南中

此間宜藉重公公薄其人不答久之陞通政右叅議
故事諸中貴以銀臺爲外府所請乞訟詞以百數動
至破人產公痛懲其敝關說不行諸中貴伺公上疏
至殿庭環而諄語以百數公不應第命持一名刺詣
司禮諸閹悉鼠竄會科臣有附執政疏言相權漸輕
者公適在大司馬李公坐謂公曰此疏殆有微指李
公曰何謂也公曰是欲以道四明山陰責耳李公未
達明日臺省藉藉如公言李公謂公曰僕閱全疏數
過未喻公見疏首卽了了此其智奚翅三十里哉有
丞某具疏言天下事以時宰方唐楊綰宋文彥博公
謂其熒爚視聽屏去不奏會署務旁午於一切奏報
多所釐正梓爲書安甫故瘦削似不勝衣又重感時
事紛沓有遠引意遂乞差歸里於近市隙地構一小
樓爲避囂計亡何以疾卒平居無疾言遽色臨事不
以利害禍福動其心自髫年與伯兄貢元公季宜黃
令共朝夕驩甚及宦遊撫諸姪如已子處私室雖溽
暑不岸幘變童季女不入門食不兼味布衾裘葛不
敝極不更爲也嘗言仕宦須早爲歸休計卜地爲園
林鑿池養魚植花散步聊以頤性命攝身心何必車
生耳哉通籍至臚仕手不釋卷尤好爲詩歌不作近

人語而天奪之年弗竟其學所著有享帚言南遊草
悠然齋尺牘納言愚得周易注疏等書行於世生嘉
靖戊午卒萬曆庚戌年五十有三

南京通政司右通政強珍傳

實錄

強珍滄州人字廷貴成化丙戌進士初知涇縣奏減
賦額人爲立祠爲御史負氣敢言嘗按甘肅及江北
諸府人凜然畏之按遼東會權閹汪直挑釁僨事時
無敢論者珍獨上其罪下詔獄撻辱備至謫戍遼東
三年有旨復職致仕弘治初起爲山東按察司副使
未幾爲大理少卿遷右僉都御史巡撫宣府坐言官
論列召還改南京右通政以母老乞歸弘治十八年
八月卒珍性強鯁政尚嚴刻所至有風采爲時所重

中憲大夫南京通政使司左通政湘陰夏公崇

文墓志銘

儲 巖

太師夏忠靖公有孫曰崇文字廷章仕至中憲大夫
通政使司右通政考諱瑄歷官太常寺少卿有大志
慨然自負不售知於人凡太師所以佐本朝者授諸
廷章語輒解悟蓋其父子自爲知己故廷章議論行
誼克肖其家 敬皇帝初臨朝羣臣爭上書言事進
士李文祥忤執政者謫咸寧丞廷章適考績寓京師
拜疏言明詔首求言故忠義之士咸感激以進今文
祥以言獲譴彼一人奚足惜第恐人人以爲戒塞忠

諫路且新政抑何以示四方衆皆危之無何執政者相繼罷去文祥仍改京秩繼又言慎終惟始宜選儒臣日勤講讀祖宗謨訓宜書屏障觀覽宜召用大臣如故事朝夕接見以議國政宜慎名器禁奇巧斥異端裁冗費錄功臣後褒節義之臣皆今日所宜先者尋又指大臣之邪正者乞進退之所謂正者前兵部尚書王公竑暨給事中王公徽也弘治辛酉北虜跳邊兵踰年不解廷章罹內難服已闕卧病家居泫然曰吾世臣也豈以私戚而忘國家之憂疏十事入遞上之親大臣舉賢才理財用任將帥修武備採羣策

明賞罰敷忠信廣仁恩正士風其凡也覩縷蓋數千言未報傳邊劇日甚復彙括前事力言之在太僕寺丞有上言歲罷民間俵馬請徵價者廷章言祖宗藏馬於民歲孳牧之以備調發慮蓋遠矣若槩徵價久之種馬亦耗脫有警何從得馬乎言者計非便乙丑五月敬皇帝棄羣臣上宅憂屬有星變卽奏言敬天惟在思孝賞罰用舍一守成法變異將自弭矣是月虜寇宣府我師失利復惶遽極言備禦之策殷勤鄭重若不測在旦夕者且曰此虜爲中國患史冊所書痛不忍言矧星文示儆尤不可忽會詔諸司陳

利病馳上五事勤政學慎起居節冗費謹邊防公薦
舉皆切務也廷章每建白輒傳以家世舊聞祖宗典
故忠誠溢發其言明白痛快 天子察其忠詔有司
多議行之間有彊直語亦不以爲忤初以進士選南
京吏部驗封司主事進郎中在署久當轉官太宰耿
文恪公語人曰夏崇文太師孫不宜補外乃薦陞通
政使司左叅議轉太僕少卿始至今官以便母養官
南京廿有五年得年五十有二正德丁卯春三月庚
戌以疾卒於織錦坊之私第廷章始以援李進士知
名其後愈慷慨論天下事當世公卿奇其才率以公
輔望之數歷留都官寢顯矣使臻柄用恢張所蘊蓄
要其功當不止文字間覽其章奏可以悲其用世之
志矣

中憲大夫南京通政司右通政南湖余公本

志銘

張邦奇

嘉靖己丑十二月十六日日將中矣南京右通政余公過予予迓之庭升階聞友人汪汝成都憲沒也愀然動容焉坐定談汝成事秩秩不少亂已乃咨嗟悼惜殊不自堪忽暈眩喘急戴目垂手欲僵予驚泣叫呼不應手灌湯藥弗愈踰時氣漸微乃絕其子九疇輩奔至伏尸而哭乃以卧輿舁歸其第嗚呼痛哉公諱本字子華世居鄞城南臨月湖故號南湖余氏參知政事天錫之後公曾祖諱烟南安府同知生愷愷

生謙德卽公父也。豁易慈孝鄉稱善人。以公貴封翰林院編修。階文林郎。母夏氏封孺人。愷以弟愷早卒。弗嗣。命文林公後之。公孝愛性生而英邁。連屬動師。聖賢娶未逾歲。遭母喪。終其制。不入私寢。今刑部左侍郎。聞靜中先生時。就讀其廬。卧起必偕。能悉其情。云始公少游府庠。斤斤自持。不少剗觚角。每候謁上官。諸生多叢聚踞談。而公與聞。汪二子恒斂襟獨坐。一日相就。問姓名語。合遂爲契友焉。正德庚午。領鄉薦。辛未。廷對擢進士第二。授翰林編修。明年念父老。無兄弟。疏乞歸省。時例京官省親離庭。幃六載。乃許。公未及再朞。而特旨允歸。又明年奉其親。就養京邸。尋充經筵官。時權奸迭興。文事廢不用。公慨然具疏。指切無所忌。至再上不報。乃疏乞補近地儒學官。便祿養。當道難之。乃請擢廣東按察司副使。提督學校。至則毅然以釐俗作士爲己任。秉公力勤務行。厥志然。素性骯髒。視卑陬咕囁之態。不啻若臭穢。行事一不當於理。卽義形於色。或面折不少容用。是與巡按毛御史鳳積不相能。劾其不法數事。而毛遂肆其莠言。以相詆誣。詔各回籍聽勘。毛以京考落職。而公適懼外艱。服闋當道。令公赴選。公不可。嘉靖丁亥起復。

山東按察司提學如故行事不改嶺南戊子秋試士
 之中式經公所首選者幾半其年四月陞南京通政
 司右通政凡文牒無細大一一訊辨擇可否罷行之
 曰不爾則無以遏讒說詎殄行非朝廷設官意也官
 宇頽圯會以時詘禁工役公乃計處工食若干佐以
 俸餘費不涉公帑役不越輿隸而堂廡煥然嚴飭莊
 固見者服其能焉今巡撫山西都御史王天宇先生
 者公友也嘗曰吾每有舉措或沉吟未決思子華之
 風卽沛然矣蓋公臨義必赴於得喪是非死生禍福
 不一置於懷故能無所瞻顧若鷹攫瀾趨莫或牽掣
 家居食貧稱貸無虛月親族有急輒傾囊濟之或為
 假貸而公自償焉從父兄某弟某皆早孤文林公撫
 養如公比長室之且給之田若干畝公於書無所不
 讀見古人奇偉事躍然期必為之至奸臣傳其擊節
 罵詈不釋口禮樂天文陰陽律呂皆研窮其數為詩
 文直寫已意不屑磨鍛崇華飾作世俗語 而典雅
 確實克禪世教其雄才大節使當大任當為國家長
 城太阿無疑而遽止於此知者惜之公生成化壬寅
 月日得年四十有八

中順大夫南京通政使司右通政介立林公時
行狀

公諱時字懋易號曰介立山人姓林氏其先徽之休
寧人也大父曰志賢成化間以商家汝陽志賢配王
氏生松軒先生雲雲配沈氏生一子卽公公配毛氏
生二子宏密繼曹氏生一子寓側室苑氏生一子定
公既貴松軒先生累封奉議大夫南京通政使司右
參議母沈氏累封宜人繼母潘氏封宜人毛氏封孺
人贈宜人曹氏封宜人公以弘治辛亥十二月十一
日生十三年癸卯入郡學庚午舉河南鄉試第二丁

丑舉進士爲翰林庶吉士己卯授檢討尋以內艱歸
壬午起復會修武廟實錄爲纂修官癸未爲會試
同考試官乙酉實錄成進編修爲經筵官丁亥擢國
子監司業辛卯改南京通政使司右參議甲午擢右
通政乙未改提督膳黃會繼母喪歸遂卒是年十月
二十五日也壽才四十有五公幼奇疑穎悟絕人六
七齡讀書一日成誦弘治之己未也大父卒值家中
匱時甫九齡或日一食或竟日不食讀書不輟名翹
然起乃後益貧郡學生有倪子聰李子松熊子選者
約以文會互爲食初松軒先生爲里張氏塾師公亦
寓張氏旣張氏子不學乃脫毛宜人簪珥僻巷僦草
屋三間居之屢空自得雖戚屬富者一介不以取也
後爲舉人則有郡守新城畢公昭問周之畢重公學
每夕必輕輿造訪至巷不容輿必踵就爲與論古今
常變經史信疑或以私託畢日絕不道及在館務學
益勤劬每讀書夜半爲文深思不苟蓋自少篤確不
嬉戲寡言笑至是德益成閣老梁文康嘗曰吾閱人
多矣館中惟君一人同考禮闈也閱卷精慎退卷復
再三閱故最後得朱佐者會議大禮忤旨與同官俱
逮獄杖二十病踰月乃間武廟實錄且成惟迎立

今上等二事未決衆議紛然公奏記副總裁中峯董公曰昨聞迎立一事或云由中或曰由內閣誅賊彬或云由張永或云由楊廷和疑信之間漫然無據史萬世是非之權衡固不可以偏重時竊意廷和以忤旨罷歸永坐罪廢今上方綜覈名實書進二事必首登乙覽恐將以永真有功廷和真有罪不待左右汲引排擯而君子小人進退之機決矣矧夫信以傳信疑以傳疑史臣體也二者既未嘗親與其事可信可疑宜嚴其有關於治忽者庸詎私一廷和哉幸執事裁擇輕重之固是非之權衡也董公以白之總

裁驚湖費公可之書進天子由是乃傾心任宰輔而宦寺之權輕矣爲司業立十二會選博士堂官文行擾者六人分領之月終稽核親爲改正戊子舉鄉試三十七人而元與亞胥此出每會講博士堂官呈稿必痛改或不存一字集講章二百餘篇教勲戚定國公而下二十二人授業日禮遇如書生體貌峻絕坐亡所絀怠者必斥勲戚至有縮頸流汗者曰西廂宗師難親如此臨諸生務實守法不少假借以說人誠闇者不得於私第約見終四年門亡班坐一跡諸生中有悍惰久不至請託者一切繩以法曰朝廷法

非吾意也異日有持當路之親面抗者曰吾以司業治監生非治當路也爾何抗痛責之已而閣老有遣祭文廟者作詩得御和遂欲立石於廟司業曰不可文廟具瞻之地一物不可損益況有聖製可輕舉邪事遂寢及孔子祀典成有欲上表稱謝者司業曰吾既不能正又從而謝之人其謂何事又寢亡何慎選師儒之議起公上疏請休其畧曰臣職在佐祭酒提調六堂比之各官不稱尤甚緣臣叨任前職已踰四年當教典廢墜之餘不能振飭久媿素餐然猶可於因陋就簡之中少致興滯補敝之力今 聖明銳意

修復先朝積分之法將使善者舉不能者知所勸懲者進不肖者亡所容臣雖至愚殊切願幸顧嘗私念此法之行非公亡以服人非明亡以辨類非嚴亡以警惰非恕亡以悉情四者教之所由興也臣未能一焉誠難以表率人才作新善類乞勅吏部將臣罷歸田里選任才賢則道尊教成而真儒善治之功可計日收也 上下吏部覆奏獲升在京別用之命已乃改陞南京在南公事殊簡升堂後寂如也暇則取諸經傳閱之作文賦詩亡虛日嘗著介立子未就會憂歸焚焉初奔喪急途中積熱十月疾作謂子宏等曰

吾所爲爾曹極知之能勉於爲善吾死亡恨矣天下事平生儘有志卒不能一爲命也當復柰何越十二日遂卒是日大風霾汝人聞者皆曰吾汝泰山頽矣至有憤惋泣下者介立于剛方英敏人不能給亦不敢干以私不善諛人亦不喜人諛質直坦易亡隱曲亡蓄宿人有過必面規之亡私詆險者必深絕之亡所顧寡合自信在南嘗署篆工部又署太常光祿雖權攝弊亦稍革光祿署丞數人深服之所至吏隸雖不加以威亡不惴慄閒居亡惰容說則放歌獨酌疎爽慷慨其襟度恢如也

南京右通政前禮科給事中會稽沈公束墓志

銘

張元忭

嗚呼自昔忠臣烈士感激於一時引領就斧鋸而不避世尚以爲難至若以直諫幽囚十有八年旣出而辭榮忍凍餓以終其身如吾會稽沈公者古今有幾哉公諱束字宗安自稱梅岡子當 肅皇帝季年分宜父子怙寵專政諸所進退一以賄入爲低昂公初拜給事中每觸事憤愾將論列其罪狀語稍漏會總兵周尚文卒請卹典嚴氏憾其素不附已報寢公抗疏曰臣聞上有必行之賞斯下有必效之忠尚文忠

勇素著國之長城其死也邊人亡不灑淚者而身後之典格而不議其何以示勸夫當事之臣不能上體聖心任已意爲予奪臣竊悼之疏入嵩大恚條旨杖公闕下尋繫詔獄垂絕者三四恍惚見神人金甲頽然立於前呼先生者三徐曰少忍亡恙旣數月而創始愈先是公配張孺人自會稽來念公未有子置妾潘與俱旣至則公已下獄三日矣張孺人語潘曰吾忍死以視夫朝夕分也若艾年且未識大面寧能共守乎潘涕泣誓以死待卒相與茹荼苦拮据女紅易升斗獄中橐餽賴以僅繼日惟兀坐玩周易著周易通解及文言說內外本末稱名辨多要眇自得不苟襲先儒齒頰發爲詩歌悲壯悽惋令讀者裂眦酸鼻庚戌冬虜人犯闕京師戒嚴詔集廷臣策所以退虜者國子司業趙公貞吉抗言於朝曰驛沈束之囚以求直言錄周尚文之功以勵邊將卽虜可不戰而退亡何趙公竟斥去公在獄聞虜狀輒具疏請得精騎五千往來督戰以外疑虜而內翼蔽都城且度虜飽而歸必道涿鹿出遵薊或衝突於宣大宜傳檄諸路乘其惰歸設奇夾擊必大勝嵩見疏輒又斥去曰囚安得上書其後餘姚趙公錦以御史上虞徐公學

越中
四諫

詩以刑部主事會稽沈公鍊以錦衣經歷先後上書
論嚴氏卒被逮譴謫以去時號越中四諫而嚴氏恨
越人特甚會有構者謂錦衣與公本同宗疑有連於
是益切齒欲甘心於公屬主者加械公手足公分且
死誠家人庀後事張孺人徬徨紉衣袂具兩棺期俱
死已而華亭徐少師聞之爲中救得免然嚴氏日夜
以蜚語中公浸惑 上聽壬戌嚴氏敗公繫獄旣十
有四年而公父邠州公年八十有七疾且革思一見
公於是張孺人伏闕上疏請以身代繫令夫得一見
父以瞑凡三上乃下部部議上不報然 上意稍稍

動矣當是時 上常居齋宮好鉤察外事卽獄中一
語動目錄以聞謂之監帖然守者或亡所得則姑塞
以謾語丙寅冬帖進云有鵲當沈束前噪不休束曰
豈有喜及罪人者耶蓋謾語而 上信之會何公以
尚疏救海公瑞忽有旨下何於獄而釋公公歸而邠
州公已不待矣乃踊而號曰痛乎生不菽死不合吾
尚得爲人乎於是枕塊水飲佯狂自廢丁卯 莊皇
帝登極首錄諸諫者起公原官上疏乞補制尋遷都
給事中再遷南通政竟以疾辭自是獨掃一空左右
經史日夕研討其中所著有易圖洪範律呂諸說書

鴈書
鵲帖

詩春秋周禮諸解及潮候集雜詩藁惜多逸者家故
貧僅有田十餘畝婦妾并日而食處之怡然有司斲
一望見顏色不可得也辛巳年六十有八微疾而逝
少時好讀蘇武傳每讀輒掩卷歛歛當食或廢箸由
今觀之蘇處北海十九年白首歸漢公繫獄十八年
亦白首歸田蘇之歸也以鴈書公之歸也以鵲帖皆
託之人而成於天事誠有不偶然者然蘇尚拜官而
公不拜蘇有子而公卒無子其節愈苦而數愈奇天
道其何如哉公之先本宋文肅公紳之裔世居會稽
之臯步里高祖潭以子性爲御史封御史曾祖恪祖
琨並善書父儘倅袁守邠並有聲公生而警敏嗜學
其舉於鄉爲癸卯第一人甲辰成進士出理徽郡三
年而拜給事中禮科財三月而上書下獄矣其出獄
也潘猶一處女張孺人冀公有後日令潘進御而身
出汲入炊無難容父沒未幾而潘亦尋沒矣凡公之
勁節介行雖所自樹亦其婦妾能成之也山陰徐侯
貞明表其里曰一門風節太守蕭侯良幹請祀公於
學宮

南京通政司左叅議李文郁傳

實錄

南京通政司左叅議李文郁湖廣襄陽人由教官擢
通政司叅議永樂初陞戶部侍郎未幾坐事謫戍遼
東 仁宗皇帝卽位召至復爲叅議文郁性介直謹
持守久處患難不移其志宣德七年五月以年老自
陳遂命致事

南京通政司左叅議張公詡傳 黃佐

張詡字廷實少負經濟力行好古不爲口耳之學莆田彭韶見其少作詩美之曰嶺海孤鳳也成化甲辰登進士疏乞養病歸總督兩廣都御史屠濬俾有司促之仕遂北上授戶部主事尋丁艱歸隱居二十餘年弘治辛酉巡按御史費鎧疏詡學問優長操履端慎杜門高尚不干時事部書下有司速駕詡以疾辭不起正德初御史程材王旻前後疏詡少從陳獻章講學祖濂洛正派爲嶺南學者所宗師友淵源踐履純篤閉門養病讀書求志可大用部書再下詡復辭

如前繼而吏部以詔敦龐博雅綽有古風恬靜清修
欲忘世累薦不報壬申巡按御史周謨疏詔議論明
正事體疏通言不忘道志不忘君癸酉御史高公韶
疏詔學有體用不爲一偏之行以聞有旨起用之甲
戌拜南京通政司左叅議檄下趣上道先具疏辭遂
抱疾赴南畿謁孝陵而歸抵家不閱旬卒年六十詔
嘗贊白沙遺像有曰嗚呼噫嘻大道堂堂其顯也鏡
中鼻現其隱也海底金藏蓋其所見類如此

南京通政司叅議朱公廷益傳 郭正域

朱公廷益字洪虞別號虞對先世婺源徙武塘曾祖
鳳祖賢父建侯三世廣文母張孺人以嘉靖丙午生
公幼慧攻苦習勤篝燈於帷伺父母寢熟擁被起讀
十四補諸生有聲慨然曰古人以秀才任天下豈其
時乎祖象齋公喜曰是兒非常朱氏其興乎庚午舉
於鄉不辦牢醴不鮮僕從讀書蘭若丁丑登進士令
漳浦下車問民疾苦謝絕饋遺歲不登捐俸糴粟徒
跣郊垆手調粥糜全活無算凡城塹之壘圯者衢路
之填隘者煥然拓新時朝政刻覈草疏千餘言且上

大宗伯林公阻之曰其然勿撼二尊人乎瞿然謝之
乃已屆試期以短喪策諸生邑諸生莫不色動亡何
以救荒論列得旨降級怡然而行父老攀號踰五百
里建祠羅山歸家研精理學將終身焉癸未謫判連
州隨令嘉定饑疫相仍百計勤恤邑苦漕兌懇言於
大司農得改輸又疲於征布控於監司少寬其期凡
濬川源墾蕪田稽賦籍覈納田功倍於漳三載不通
家問丙戌擔簦跨蹇上都門槩無所修費治行第一
且注銓曹依依二親不能北請南遂以南儀部行過
嘉定邑人鏤旃檀爲象而祝之大宗伯徐公學謨列
其政於道左邑人又祀之婁塘在儀部時闢易數萬
言故事禮曹郎宴享費出諸伶悉屏去之移南選司
主事革吏椽納班銀遷考功郎請託不行少宰海公
瑞曰朱君嶷嶷中流之砥柱乎下交爲同志友巳丑
奉勅提督江西學政訪先賢陸象山徐孺子謝枋得
羅文貞楊文恪及死事忠臣鄒瑾魏冕後裔優錄之
復訪布衣章漢黃托躬詣其廬幣聘主白鹿洞凡二
載校士環十三郡者再一日臨建武益王餽古琴受
而檄於學官以備羽籥翌日以妃弟請不應諸豪貴
人不敢干人服其公嚴辛卯擢南光祿寺少卿汰冗

食涓祀品便糧役亡何以上特用爲南大理丞每刺獄殫精竭思僚友憂其羸弱以爲言嘆曰問學之功祇在人事天行健不行息矣癸巳歲都御史李公世達侍郎趙公用賢相繼去上疏言老成當惜不報冬以憂歸哀毀骨立冒絮衝寒以下窀窆戊戌奉母北行至丹陽以病請季秋起南通政參議明年之任公署司事每黎明問訊兩造時璫使橫行多所株逮江湖道梗上疏言小人蠱惑萬乘騷動畿輔不報明年修通政司志成庚子春推提督四夷館太常少卿命未下仲秋患痢十餘日卒先是夢天樂盈空乘雲霧

而上復見巨星如斗嗚呼豈其乘箕尾爲列宿聆鈞天遊帝所乎卒之日鄉人檢其遺囊僅得餐錢數銖暨一葛耳嗚呼世有官爲大夫列仕版二十餘年而貧如此者乎公天性至孝甘毳先奉二親出入請命祭祀躬自涓滌一稟於古待宗黨友朋多所賑貸食無兼味衣無重纊人有所請曰某不敢以子弟干人可爲他人請謁乎祖父遺田不增一畦凡片長一節之士虛心引薦不令人知不受人報曰行一善曷若成一人所著有語錄幾卷詩百餘首名曰清白遺稿言志也邑令鄭公聞於學使者祠之鄉賢公自丙午

迄庚子年五十五歲子衷純

論曰賢士大夫無不飾簠簋而或不信於人或小推而大攫或陽吐而陰茹朱公之貧真貧也批鱗君子筮仕而侃侃末路而墨墨豈其殊操後乃金注矣朱君靜而正之麤而翹之白首如一遇事風生綽有條理聽者悚動不隕穫於貧賤不充訕於富貴天假之年矯矯錚錚古之遺直乎

焦大史編輯國朝獻徵錄卷之六十七終

